

泊

鷗

山

房

集

泊鷗山房集卷七

會稽 陶元藻 鳧亭

傳四

士宏公配章氏傳

章氏士宏繼室年二十二甫嫁入更寒暑遽稱未亡當士宏病革時章以死誓士宏執其手泣而言曰皤皤者老呱呱者雛惟爾是肩爾死吾何賴焉章嗚咽良久起而承命曰操井臼秉刀尺勉支中饋以奉舅姑戊子許都餘賊擾越東劫物傷人村堡奔竄章攜幼女入水閣登櫓板而匿之恐兒啼以衣祫塞其口賊無所聞始免

於難課兒夜讀貧不能具膏油燃竹燒藜手持以照課
兩孫讀亦如之逮孫成立欲以節孝梗概陳情報劉章
曰兩世先人未封馬鬣爾輩又勿克騰身科第高大門
閭徒欲爲老寡婦謀顯揚事耶不許宗黨賢之至乾隆
庚子曾孫化鵬始聞於有司旌其節卒時年九十有九
吾族節壽之隆無逾於此者

彥直公配胡氏傳

胡氏彥直配山陰人未婚而彥直卒胡誓不他適父母
與媒妁更番勸莫奪也族人爲笄於廟立嗣以後之夫
婚而守守在情未婚而守守在義義重於情人鮮知之

則貞女之視節婦不更難能而可貴乎既

旌於

朝矣余復錄其事以爲世之孚而未歸者則

是公配蒲氏傳

蒲氏是配上虞人是甫冠病不納采而殂蒲飲泣不敢出聲志已勒然不可動吾宗迎蒲卽以待胡貞女之禮待之乾隆丁卯並

旌焉故臨高令喟林公爲作兩貞女傳言其時胡與蒲居雖前後院實一廬也年並五十強矣門內有駢冬青鬱葱經歲月今若其應者嗟乎二女同居其志又同行

則木之堅多節而駢以榮也固宜

先大母胡宜人傳

先大母胡宜人旣率之四十五年藻重編家乘讀前人所爲賢媛傳慨然曰嗟乎如宜人者真不愧斯名矣謹撮其崖畧而書之宜人乃

較贈承德郎雲南府通判祿安胡公女及笄歸我大父月山公明年大父館臨安又明年轉客灤城宜人與樊籬鑄鑰入爨下主魚燔料檢鬻脯皆井井有度會大母胡太宜人春秋高目眊宜人侍惟恪凡眠漱唾嘆至於中裙牕次曲體靡遺宗族咸稱其孝旣而大父自灤城

歸得危疾醫者惶悚無措宜人籲天請代抽刀剗左臂
血淋漓被地密投粥糜以進病頓瘳大父勿知家人亦
莫有知者逾年大父覺爲之泣下宜人性仁慈見棄人
輒憫嘗自節其盤餐日用爲施給計凡里黨親串之癃
瘓惄獨三旬九食輩藉宜人飼養畱殘喘者無算會天
寒大冰凍有隣婦失足墮橋下起僵宜人聞之亟脫身
所衣絮衣遣人裹之甦宜人不以爲德隣婦感終身康
熙五十二年遇

覃恩封孺人雍正元年復奉

恩詔晉封宜人凡兩泝蜀江一踰閩嶠祿俸所餘未嘗

一置鮮服華裙及金翠耀首曰吾安儒素人矣忍以珠
帕茜袍易釵荆裙布哉有竹簪一枝未嘗離鬢髮將屬
纊呼藻婦前曰吾用此簪六十年矣汝賢吾與汝藻嘗
賦竹簪詩以誌不忘勤女紅每挑燈夜紡未就枕而荒
鶴鳴四野者率以爲常年八十一年初病之夕猶聞室
內紡車聲至病臥不能起乃已回憶宜人有二弟長曰
海門通籍時照耀鄉里羣季亦皆有田園之娛彈指閒
悉式微厥後幾餒若教而宜人綿延五世傳科名登士
版者勿替以是知天之報德祐善爲無窮而播述徽音
亦足以爲巾幘笄珈者勸

先妣章安人傳

先妣章安人外大父一貞章公長女也年十九歸於先府君初道墟章氏言饒裕者必日朝九公朝九公者安人曾祖也至外大父家業凋耗繡姻時大父母竊憂之謂章氏雖中落而兒女子猶耳熟豪奢習恐不諳吾家儒素風及安人廟見後刻苦儉勤澣紉悉親操作無纖毫後惰容大父母大喜三年隨大母入蜀汎夷陵上巴峽經灔澦黃牛會月黑過夜分舟中人皆熟寐安人忽聞舟底有聲以手捫之板脫數寸許水駁駁入安人恐大母驚勿語亟噏衾裂枲以彌其罅水稍止迺呼

家人起易舟行當倉遽時智識有如此性激慎事大父
母尤謹在官舍時每進膳必手自烹芼未嘗一委庖人
大父行朔望禮雞三號卽乘輿出每鞠獄輒漏下至三
鼓安人必謀所甘以進大父喜食牢丸不托粃粃餵餧
之屬而襍以餬飴偶犯葱潔肉鬻卽不食安人備知之
復所治精潔大父曰此眞中饋婦也賢之越數載外大
父家益落而大父由蜀遷閩凡十有七載宗黨親串友
朋投官舍屢滿各有卹或謂安人曰安人父曷不來官
舍一遊安人曰我父貧有骨必不來吾亦不欲吾父來
而外大父竟十七年不一來旣而大父挂冠會臨朐事

波蔓襍沓負郭蕩然府君將赴三山幕謂安人曰吾行矣今家貧苦汝安人曰吾初入君門固此境也吾安之有素矣且君家固未嘗富今何言貧乃典衣鬻鉶以佐盤匜日用復率僮婢灌五畝園夏韭春菘怡然自得是時外大父乘小舟來訪大父或一歲一至或隔歲乃至至必徘徊旬日時年俱七十二老婆婆歡然道故襍談今古兩不言貧安人敬外大父視膳問起居一如事大父者人以此重外大父並重安人年五十府君卒安人痛不自勝繪像懸室中每遇甘脆時物必泣而薦之曰吾不忍獨嘗此味數十年如一日安人端莊持重治家

尤嚴整無譁聲無紊跡能面叱人過人畏憚之雖疎逖
在期功外者偶嬉遊聚飲亦必低語怵惕搖手戒曰毋
令安人知也處事知大體持論與尋常巾幘異見不茹
葷者鄙之見比邱尼女道士尤惡之嘗曰雞豚魚鼈天
生以養人棄而不食則違天至僧尼輩乃世之蠹以錢
飽蠹愚甚適爲蠹笑且爲善不在此故終老不持齋不
施空門一錢不焚香燃燭一禮拜毘盧遮那釋迦觀自
在等身藻嘗肄業於東闕及入仙石安人念不置時致
肥炙蠶毳慰勉纏綿居家有賓客至安人輒從屏後窺
之聞與談經史暨詩古文者輒色喜曰此吾兒益友必

命欵畱飲食雖瓶盎無粒米爨下無寸薪必竭蹶以謀
盛治酒肴出俾暢所講貫而去今藻沈淪濩老垂老無
成痛負吾母惓惓之歎然猶幸不見絕於宗族姻朋而
海內諸君子謬加虛譽樂道姓名何莫非安人墓薦載
髮流徽所致歟年八十卒與府君合葬於謝墅之孟家
山子二長章煥先安人一年卒次卽藻孫曾若干人具
詳世系云

永祉公配張氏傳

張氏永祉妻永祉早失怙恃將婚家徒壁立貸於所親
勉而成禮氏入門輿道騁從久埃無所給相顧愕眙家

人謀出其奩具質錢以犒之無難色居數載珠翠羅紈以次典鬻罄盡與永祉冷寵牛衣相於一室夷然無怨言舉一子曰宏方就蓐會永祉授徒於外不以聞覺歸而視氏曰家無臧獲備使令君之歸君之惠也雖然如荒人子弟何趣之去明年永祉遠征氏彌困以刺繡工揩柱衣食宏稍長出就外傳夜則課諸膝前共一瓦燈操女紅勿輟一夕鍼誤貫其指血淋漓不止暈而憑諸几少頃始甦宏曰母休矣何自苦乃爾氏曰兒讀廿吾指雖痛無若也相抱而泣宏藏鍼於笥以誌不忘迄今三世勿敢失永祉歸越數年病歿宏旣壯於兵刑錢穀

雖不通曉公卿大夫具重幣迎者踵相接家稍稍裕備
奴寵妾各有所司氏履豐能儉不變厭初操作勤劬迄
於沒齒年九十有二孫若儀若度皆能文有聲譽序識
者謂此乃勿荒人子弟所由報也克相夫子佑啟後昆
有德之言如是夫

思永公配施氏傳

施氏思永妻山陰人其先世某以武進士居家歷官都
督氏獨愛文翰幼卽知書逮于歸不廢課子精以詳余
故於其善女紅秉家政盡盤匜箕帚之職概勿著於篇
著其學博洽多聞以愧世之師而陋者思永嘗旅遊于

愈隆八歲氏授以毛詩爲闡明六義辨四聲叶韻極於微妙又二年授左氏內外傳太史公記爲指解隻字義古通字及句逆用法外博聞之驚又謂愈隆曰賣菜傭語往往有來處不多覽烏知之嘗寒夜篝燈縫紉有文左右之輒與女襍引通鑑吳越春秋世說等娓娓不倦女嗣是亦手執卷書不釋云思永家居不喜作鄙俗言雅好齋割人句及事以資談助親朋有瞪目不解何謂者氏聞之知某語屬某朝事或出某書了無窒碍古來婦人通文義訓膝下兒者層見疊出然率以窮嫠辛苦督課遺孤惟宋蘇洵遊學其妻程氏親授軾書軾竟以

政事文章彪炳一代元虞汲避難攜妻楊氏與子集投
居邊微苦無書楊氏口授論語孟子及歐蘇等文後集
亦克樹立蔚爲詞宗今愈隆雖非東坡道園可比氏之
教實與程楊等吾越姚江孫文恪妻楊夫人淹通經史
教四子成名皆登卿貳有何待三遷教傳經有父兄之
句功不自有余嘗以是賢之竊聞氏誠其女曰房中人
畧識字廢古人四十五日工願汝曹勿以吾爲儼也女
卽束蘭畹花閒帙弗覽然則氏之爲教不惟不自有其
功且若以知書爲悔者其智識不更遠歟

阜公配金氏傳

金氏阜妻生而慧知書明禮義父以信字篤人會充八
旗敎習伯父補山太史重愛之育爲已女曰此女淑當
聳文人不以與凡子見阜器異特甚遂字之旣于歸怡
色柔聲克承意旨太姑平太君謂其姑章太君曰賢婦
也善視之阜館於外所得脩脯悉奉章太君處氏欲買
一鍼一線不可得恬然室處罔怨益恭章太君疾作阜
衣不釋躬脇不貼席者數十晝夜竟積勞致病天其年
遺三子一女俱幼日攜且抱以哭諸殯所其弟衛亭過
而弔視而感傷曰吾不能爲姊氏已貧然孤寡不得食
責在我挈之去諸孤稍長延師課之凡每夕召膝下考

稽所讀道述兒父苦志潛德藴由顯揚至於泣下遇甘
脆食必遺捷足賚兩姑以時返棹問起居如是者數年
一日愀然曰吾夫以事姑死吾忍不事姑生乎畱子女
在郭自歸堰中入門蕭槭勵十指工易錢供中饋作苦
同於廝養及太始與姑相繼歿含殮事畢復經紀子女
婚嫁劬躬蒿慮備歷未亡人苦者數十年以節完其世
厥後三子復亨復貞皆才煥名尤著人以諸孤各自矜
鬻勿墮墜家聲咸德衛亭誼高不可及余竊謂凍餒克
免絃誦是循衛亭有焉若夫煥之能讀父書魁齊魯多
士實由母教勤於外傳且窮嫠茹荼飲藁食報自天功

不在舅氏煥原名復光又曰中朗奉禮部易今名癸酉
副車乙酉鄉薦籍山東

美聚公配何孺人傳

何氏美聚公配父仁佑祖調之官兩淮鹽運司副使世
居山陰之峽山生而夙慧八歲見同祖兄篆百壽圖諦
視良久歸而仿之如出一手稍長父兄講授綱鑑及歷
朝詩古文俱識其大意年十七甫歸於堰拜姑之舅姑
畢再拜舅姑韋弦殊性仰承莫可測人爲新婦難之其
母尤憐女幼在家素逸樂恐不克盡厥職戚甚氏乃曰
世俗所謂重慶者子與婦等耳人求之不可得而吾竟

得之是吾所幸也戚矣爲於昇調治甘脆審視寒燠抑
搔定省以旦以昏詰默進退悉中意指兩世則一襄賢
許能母聞之大喜越六載美聚公亡遺孤三日墳曰篋
曰明善初就博讀書貧難持拄不能卒讀命採薪於山
或曰於兒何益氏曰然吾固知其無益也第少年人勞
則志壹逸則心馳固知無益而猶役之者吾懼其嬉而
惰放而入於邪也三子感泣家本支多寢先人有祀田
咸思鬻之以爲利諫止之勿聽亟乘舟歸峽山峽中人
有聞其事者謂之曰是可析而取也曷爲乎歸歸將勿
及氏喟曰吾惟不忍見其利以有此歸也嗚呼可謂賢

矣春秋屆五十有司以節聞蒙

恩旌表至是塽輩始克樹立飯其親而未亡人荼苦瓊屑複沓已冗積若恆沙又十有八年而卒氏素精女紅於像生技尤工妙得其值免瓶罍恥者有年像生卽漢宮翦綵遺製始以花擅名後則亭館士女鳥獸器皿百物無不備峽山土穀祠里人輒以此肆布於筵爲神壽壽神者必取給於氏家行且久某歲司事者思減其值弗許怒去將他購焉氏心方悵悵謂藐諸孤從茲餕矣夜夢神告曰無憂吾非汝製勿享也去者當復來明日其人忽心動果來當題

旌時新例於所奏中簡其一錫綽楔以榮之餘皆陪貳
惟督撫作書表其間時氏姓氏居末自度烏頭雙關萬
難倖邀一日倦憑几寐夢一婦隨二女奴從外來問所
以曰我吳門徐氏沒前輩也雖然與汝偕宿而驚莫省
所謂徧訪吳門寡婦無徐氏者會御史某陳時事以窮
嫠良苦凡見封章者乞無軒輊

恩如舊施

詔從其議氏因與焉而其時適有副使歸宗重修節婦
坊者攷婦顛末乃姑蘇徐氏于歸越中者始悟夢中所
謂吳門者吳閩也夫夢近於幻幻則誕妄不可信然其

言已驗誕亦可徵故類識於此俾知苦節之能感於鬼神者又如是

碏公配馬氏傳

馬氏碏妻于歸不數年碏得惡疾肢攣肌肉潰腐膿血
霑污徧居處臭穢不可近或言此疾濡染之禍烈於傳
戶家人相戒勿過其室飲食器具勿與共氏則盥洗扶
掖寸步未嘗離又數年病劇憐氏者交諷氏病毒甚中
之徒自賊無裨於病曷稍違氏曰是吾職也吾不左右
之誰爲左右者事益謹年二十八夫亡果中其毒後十
餘年毒發兩目損壞眉落鬚髮盡禿無悔嫁時無兄姊

弟妹父母愛憐之傾貲爲奩具自夫病日鬻其衣飾延醫購遠方難致菲厚價莫得之藥求已病病終不可已奩空貧困至老無纖毫怨懟意六十有一歲以節終嗟乎人惟畏死之心勝故臣不能忠子不能孝同胞陌視審友寒盟而婦人女子亦往往游移遷就含垢包羞以失其節氏無畏死心知以身殉夫不知以身觸病也厥後三十三載勁氣貞操不磷與淄者已卜於此松柏不彌詎待歲寒見哉氏無予以夫兄之子爲子名廷璋國學生

秋崖公配蔡氏傳

蔡氏德沆妻漢陽令彥聖公女時沆以大父松田公宰
臨朐由齊親迎於楚同隨侍臨朐蔡容止端重性淑慎
幽貞不喜羅紈金翠之飾綽有大家風逾六年沆夭於
官舍蔡年纔二十有六無子生一女十齡而殤初澹溪
公有三子德沆居長仲德溥季德淳惟溥舉一子曰宗
元沆旣無所出淳又無嗣以沆爲冢子不可無繼繼宗
元而澹溪公方宰北流雄縣等邑十餘年不歸蔡與姑
相依晨夕奉甘脆甚謹呼宗元至膝間宗元以本生母
何氏始息甚徘徊未甚前蔡悒怏久之旣而溥亦以獨
子自顧影熒熒欲使宗元主兩家祖畱宗元不使依蔡

所蔡喟然曰後吾夫固不必依吾膝耳又數年復招宗元溥猶有難色蔡度終不可得復喟曰使無宗元則舅且無孫無孫則無後後吾舅卽後吾夫矣而吾更何後之爲言訖嗚咽不能出聲宗黨聞之俱爲流涕當宗元之初繼也蔡有奩頗豐且沆爲松田公鍾愛有私積悉授宗元及宗元常居本生所所授者又不可反蔡轉寰長齋繡佛與母氏同處者二十年卒與沆合葬於西山之陽宗元竟援獨子不繼之例歸宗於溥以候銓赴部

李京師

先室孫孺人傳

昔祁奚外舉不避仇內舉不失親叔向嘉之嗟乎紀善
之書寧與薦賢異哉槎儔公爲其配章宜人立傳譜中
七十年來族未有議之者蓋記其實不得疑其私也然
則余室人孫孺人之行亦何忍矯而佚之孺人孫姓世
居山陰之陽川前京畿道監察御史紹曾公孫女太學
生書玉公女也年二十三歸余同伉儷者四十有二載
余家素貧自先君中道棄捐寢益甚余奔走江淮燕薊
五嶺八閩伯兄出遊齊楚嫁氏早亡三十年中俾吾母
章太安人定省盤匜罔有缺失免門閭倚望悲者惟吾
婦是賴太安人多疾病孺人能調護維持歷久勿少怠

一夕持藥過中庭燭滅如行敗絮中者兩步心疑之藥
既進燃燭返觀有巨蛇盤地大驚聞者咸太息稱異謂
非婦德感神幾何不罹蛇毒也余客中每歲必寄金歸
奉太安人處未嘗一及孺人孺人絕無怨言太安人分
與之怡然受終勿問外來多寡數余或三四年或六七
年一歸凡囊橐筐箱孺人必命奴婢悉昇至太安人室
中命取之去乃取之不命雖經旬毫髮不敢窺人詢其
故曰吾夫之不私妻子也素矣矧太安人好周恤施與
不命而取吾懼傷太安人志也人以是益稱孺人賢乙
未冬孺人臥病三月不起已革聞太安人疾作憂曰倘

吾先姑死則姑之終是無子婦也氣絕復甦者再若遷
延以俟者及太安人乘養乃伏枕大慟命以衰絰加於
身曰吾今可以死矣越十有三日果卒生平性端重不
苟言笑舉止循禮度諸姑妯娌咸則之凡婚喪讌會必
先使人偵視孺人行止行眾乃出殫力家政米鹽醯醬
筦鑰起閉之屬必親涉勿少弛尤工刺繡絕倫眾婦女
欲窺刀尺秘競求之天吳紫鳳堆梁不暇給篝火曙光
往往接映遂成日疾勤勿衰疾亦不已衣敝嫁時衣無
綺紈增飾遇肥甘輒充中饋餘畱哺諸難未嘗一簪觸
唇吻食蔬衣布終其身子二長延珍辛卯賢書發甘肅

候補知縣次廷琡辛丑進士女蘊素端靜如母儀喜讀唐宋人書學爲絕句亦楚楚可誦年十五痘瘍有秋鐙夜讀遺照吳越名下士矣題詠天台齊少宗伯召南爲之傳以秀淑稱女孫孟鉅廷珍出善事父母年十九未嫁率屬續之久徧語家人畢矍然曰吾祖未訣別也可柰何時余在泊鷗莊夜半戶無風自開心悸將乘早潮而東孟鉅曰祖歸矣廷珍曰汝何由知之曰吾適從泊鷗問安來故知之少頃余入門孟鉅且呼且泣目乃瞑嗟夫吾婦之死必後於姑孟鉅之死不忘其祖至性肫摯老幼一轍余哀之爰附識其事於此

觀光先生配諸氏傳

諸氏以鎔妻以鎔初配魯氏諸其繼室也魯無子止遺一女以鎔好學能文食餼於庠志切騰上忽遘疫而殂諸來歸僅兩年耳時舉家染疫親黨無一過而問者以鎔弟以鑄亦臥病不能起惟茗莊公延醫視疾時相往還迨以鎔疾革諸以外事勾茗莊公經紀而湯藥含殮悉以一身肩之既蓋棺諸觸棺大慟誓不欲生茗莊公力諭之乃止茗莊公者以鎔叔氏也諸悲戚仍無已時時竊求死所家人嚴護之是年冬護者稍懈至臘月二十九日夜方半諸整衣潛起縊於梁女同寢覺大呼家

人奔救之以鑄聞而驚且泣且慰曰嫂曷爲死吾有子可後兄兄不死嫂不恤其後而死死吾兄矣嫂曷爲死諸悲始稍稍解以鑄遂以子鹿鳴嗣以鎔旣而鹿鳴患痘瘡潰不可藥諸不避腥穢親哺藥汁粥糜活於九死之下比長諸以兄之女妻之當以鎔捐館日無粒粟寸布之遺鹿鳴依本生處給餧粥而魯所遺幼女年纔逾十齡諸攜之歸母家以十指艱辛綑繆衣食俾女飽煖常逾於己身及笄將嫁又竭蹶焦思籌畫奩具一切整褐梳裹盥漱之物無所缺女曰母吾母孰謂吾無母惟諸亦曰女吾女幾忘女之不出於懷抱也然則世之

以後母而薄前母之所生者可愧矣

泊鷗山房集卷七終

泊鷗山房集卷八

會稽

陶元藻

鳧亭

墓誌

安吉州儒學訓導素亭金公墓誌

故安吉州儒學訓導金公諱輅字以賓別字素亭蕭山人也其先劉姓住河南譙城漢高祖七世孫韶襲封固始侯避王氏之亂易劉以金自譙城徙大梁又徙陽城及閩與固始傳至諱鼎者於宋靖康時扈駕南遷居越城草藐橋至四十八世諱肇德者於明永樂閒徙居蕭城東門外鄭駙馬花園是爲遷蕭始祖世謂之花園金

氏云明季有諱和者以篤行稱於鄉和生玉龍玉龍生雲蛟是爲公父公弱冠補弟子員廩食高等母嘗病且革公禱於天願以子代已而一子果夭夜夢神告曰已延汝母一紀壽矣母病累瘳越十有二載乃率家貧授生徒爲餬口計嘗主餘杭董老泉家一日獨坐玉杯堂溫經過夜半僮僕盡寐四壁無人聲思茗解渴不可得忽有少婦豔粧捧茗至以語挑公徘徊良久公怒覆茗於地厲聲叱之婦慙而退玉杯堂者董氏書堂也又館於山陰之荷湖隣有老嫗爲子婦毆晝夜哭公兼得之率從者執杖往諭婦猶喃喃罵不止公大呼舉杖杖齊

下婦始叩首乞免須臾死公乃還邑有無賴子吳關會
桀黠多貲結惡少成伍呼爲二虎八龍占奪田廬汚濫
婦女橫行鄉里人皆銜之思拔其牙勿敢近公有友人
陳雲上緣弟卒以弟女爲已女擇配未嫁關會慕其姿
篡取之雲上訟於官未鞫關會知雲上無子婦又病瘠
亟使人擠雲上水中密賄官吏斷以失足自墮蓋棺而
罷公慨然曰誰爲雲上故人者而忍使沈冤終古又安
賴友朋爲遂白令令畏關會僥張勿問白守守又置之
益憤將西渡計於中丞關會覺預命其黨挾刀斧持鐵
尺伏道左伺公至當襲殺之以滅其口而郡邑諸生素

重公慮公遇害奔救公不約而會者千有餘人擁護而
西關會黨勿敢動道旁觀者莫不歎公曰義士義士既
訴中丞中丞下其事於提刑處關會復賂提刑左右提
刑惑左右言游移不決公仰天抗聲曰今日之事不蒙
明斷吾當赴闕爲雲上死爭之提刑見公氣壯不可奪
且知祖公者蝟集於門傳聞已廣事難寢不得已成讞
達中丞遂按殺關會徙置其黨邊衛人咸快之其他朋
困乏矜孤寡化導主持成人美者未易更僕數茲不具
載載其大者有如此當其司訓安吉也課率諸生先品
行而後文章數年州之學者莫不敦樞倫紀砥礪廉隅

士習爲之一變年七十餘以久不掃先人塋墓爲悵乞
骸骨歸里識公者聞公歸競相趨謁座中履滿老屋三
間所謂含藻軒是也其南牆壘石爲小山名小飛來牆
隅有老桂一樹樹下襍藝蘭菊茶蘼牡丹之屬每花開
招相得親朋觴咏其處樂而忘年公身長七尺方頤廣
額美鬚髯雙瞳炯炯雖耄鑑下能閱蠅頭細字出門未
嘗扶杖終歲無疾病幾不知蘢苓爲何物以故親串中
如樞庵存三漢文秋圃禹聞山堂諸先生或長公十餘
歲或少公六七歲莫不先後歸道山凋落殆盡而公則
靈光巋然獨存會邑之南城有八角亭久廢術者謂此

亭在學宮左學宮右有西山如虎踞狀而左勢卑陷非
宜能復其亭科甲當盛公欣然謀諸士大夫重建焉估
費千金邑富家輸金無滿百者公徧走二十四鄉廣爲
募助雖大風雪披聳持蓋著高齒屐日行一二十里勿
憚勞鳩工伐材兩載工始竣更其名曰青雲樓樓成而
公病閱數月公率年八十有七公中歲有潘騎省之悼
誓不再娶有西溪李氏願以女奉公箕弔命賽修繪縕
卻之董老泉僕欲以女贈公復弗許數十年鰥居一室
嗟夫可謂難矣先是毛初晴檢討博洽多著而拙於書
以公書法端楷凡迎鑒詞賦及應酬屏軸便面尺牘需

莊寫者輒匱公書公無弗應迨退休之日四方求公書者踵接有僅日鹿兒滌硯勻墨界烏絲幾苦腕脫而公自辰至酉作數千字無一字舛訛遺漏者公生於順治壬辰五月初四日卒於乾隆戊午六月初一日以次子標官儒學遇

覃恩封登仕郎配陶太君乃藻曾大父燮庵公之女也贈孺人先公歿四十六年葬白馬湖落星坂祔次子婦胡於坎中公初營塋於蓮蓬山麓不吉於乾隆辛酉十二月某日改葬落星之原念太君葬久不可啓隣其右而齟之以長子暨子婦陳祚焉子二書附貢生標寧波

府學訓導改授江南婁縣主簿女三俱適名門孫四庭
客增貢生臺客桂客俱業儒廩監生曾孫二純拔貢生
衢尚幼旣卒三月冢孫庭客持公行狀乞文於元藻意
哀且誠藻惟公與先世旣有潘楊之戚又素重公爲人
不敢以不文謝謹誼次其行如右復系以詞曰

于思飄雪頑然躬勤劬筋力虛乃婁端人矩獲俠士風
落星突兀松門東日磾苗裔聲殷隆於昭令德垂無窮

四川道監察御史孫公墓誌

公諱紹曾字一乾號莪匪山陰陽川人也孫之先世自
漢桓靈時有名鍾者種瓜富春遇仙人授以葬母地遂

生堅堅生二子曰策曰權策既據有江南權稱帝國號
吳三分天下之一吳亡子孫散處大江南北餘姚之族
實由富春其住陽川者則又從姚江所遷祖某父某俱
潛德不曜公六歲而孤依兄爲食兄業鹹不樂交文士
公性嗜書苦無師時時從隣塾中竊聽講論多所解悟
臨頭王某聞公聰穎命蹇修招爲贊壻延名師教之旣
冠學大成遊西粵寄籍馬平補博士弟子員秋闈應試
以土著攻擊棄走入閩康熙丙子值賓興仍往建陵登
賢書公車四上不能第丙戌夏奉

命就職蜀中掣補開縣令開民獵悍難馴公以禮馭之

龍蛇俱爲赤子八年邑大治撫臣以公能列上上考循行取例授戶部主事旋改授兵部主事越三年簡四川道監察御史巡視南城豪強歛跡街巷肅然辛丑恭遇

聖祖六旬萬壽給事中高儀倡言

天子春秋高宜立東宮以固國本因草建儲一跪糾同官列名入奏公與焉

上震怒盡降爲額外章京限卽日起程赴軍前効力公乃戎服左佩刀右屬弓矢帕首袴馳驛走關外至蘇武牧羊坡昭君青塚等處嚴寒砭肌六月見雪酪漿瓊

內且晚充饑其地爲西北孔道差徭如織厨傳之供帷帳之設駝馬之應悉取給於効力人員公素清介橐無餘貲又倉猝啓行親朋無所贈羅掘雀鼠艱苦萬狀迎候趨踰形容枯瘁論人事之常此生馬首不復隨陽鳥而南矣

憲廟改元推廣

先帝遺德

詔諸臣雖不諳國體顧心本無他放還故里計同時出塞十有三人僅存其六蓋死亡者過半矣公聞命之下驚喜不寐驛中有白馬善走公愛之騰身而上

每日疾馳二百里忽痰涎上壅抵歸化城而卒時年六十有五越中諸卉翦枝植地以水灌之輒得根而活惟桂則十不一生當公之肄業臨頭也齋有老桂偶折一枝植土中默禱曰吾他日能爲官人枝當生不則枝死既而果生明年且茂有花遂以科名自負志愈奮勵迄今數十年此桂猶未萎臨頭人呼爲御史桂云彌留之頃有遺訓數行藏於笈猶以老病莫支不能報効

朝廷爲憾其惓惓爲國之心終始如一有如此初授文林郎加授奉直大夫配王初封孺人晉封宜人公生於順治某年某月某日卒於雍正某年某月某日子一書

玉太學生女二二適贈通議大夫通政司使通政使陳
公某長子某一適國學生陸某孫二長祚蕃例入成均
次祚昌孫女二長適山陰庠生姚大源次適會稽廩監
生陶元藻曾孫六人皆公歿後所舉祚蕃由薊門扶匱
歸厝張市又十易寒暑於某年月日始與王宜人合葬
於張市之原屬藻爲誌適移棹嘉禾未之應而祚蕃入
洛卽率於旅邸又五十二載祚蕃子鳳翼持公遺訓詣
藻如父請藻文雖不足重然迄今不言恐後竟無知其
事者爰述梗槩命鑽石埋於隧中允鳳翼所以答祚蕃
也其詞曰

循聞於邑忠見於墀言官不言厥位如尸惟不位尸天
終佑之龍荒萬里來歸空斯有封有樹古否今宜後懷
厥德視我質辭

勅贈文林郎福建赤杞場鹽大使信齋金公墓誌
信齋金公旣卒之五年冢君衢泣請於余曰衢與弟衡
皆少孤且寢比長奔走衣食歷三十餘載始獲事先人
窀穸顧埋幽之文尙闕懼久且無徵願先生憐吾父而
誌之余憫其意而諾焉公諱甌字李仙又字信齋蕭山
人也宋靖康閒有諱鼎者由閩始徙山陰九傳至肇德
復由山陰遷蕭邑蓋三百有餘年矣祖輅篤行君子也

爲安吉州司訓父書明經公生而嗜學然體羸弱多病作詩文構思輒達旦不寐未嘗以病弛當總角時有邑宰某喜讀書樂交文士碧園公攜公入謁宰叩以日課朗朗背誦數千言不止隨舉一二條詢作何解卽辨析了無疑義宰大奇之曰惜吾無女有則必歸此子弟壻固玉潤顧吾老醜不足當冰清是媿耳嗣是進謁彼此交呼翁壻親厚若素聯姻姪者一時邑人傳爲美談性端直言無違異行無矯飾爲人謀事有肝膽終始不渝然姁姁謙卑未嘗動聲氣親朋危急告貸於門必百計以周之幾不知已之瓶罍罄盡也屢應童子試不利循

列入成均恩一戰省闡決勝負益刻苦攻擊業體益羸
於乾隆己巳七月十六日卒年三十有五士林惜之乾
隆五十年葬冠山之陽俗所謂詹家湖是也配童甘肅
安西衛耆司公諱嘉謨女子二衢附貢生衡福建福州
府赤杞場鹽大使女一適庠生來翔燕自衡服官邀

覃恩公贈文林郎配封孺人先是長兄庭客次兄臺客
皆長公二十餘歲早經析箸自傷幼稚艱於生計依母
氏陳太君就兩兄食孺人入門謂公曰君今有室豈可
復以口食累伯氏矧姑老不養雖愛憐何裨乎貧吾勤
女紅稍可供朝夕以君之學出爲館師則硯田亦尙有

蕤也公從之族黨皆謂閩中婦賢遠乎人公歿時衢年
十二衡方憇女八齡空乏較公存甚孺人艱苦萬端撫
至成立咸有室家今與公同穴何媿焉憶公家自素亭
公始與寒門世敦戚誼余年方冠走視碧圓公殮又三
年哭素亭公於賓所公之率余在京師訃聞不怡者累
日昔韓昌黎誌馬少監謂吾年未四十而哭其祖子孫
三世於人世何如也余適類是且司訓明經鄙人已兩
爲誌傳今年七十有四矣復爲公撰文墓下感舊之懷
殆有甚於昌黎者乃爲之詞曰

羹沸蜩螗雷鳴釜瓦公獨何爲聲瘖於野泊然顏瓢水

飲姑且椎髻允嘉克贊廡下天不假年中道而捨鬢彼
高岡安貞其嘏我文暕蕪厥德焉寫翹翹鳳毛慶餘來
者

劉楊二安人墓誌

乾隆四十九年冬余冢婦之兄候選別駕何裕理由大
梁歸卜吉於臘月望日將葬其婦劉安人與楊安人於
棲鳧之原泣而請於余曰理先後兩娶婦皆頗循婦職
不幸皆天死穸有日矣欲厚其葬不可得且無裨於死
而惟垂於文字者爲無窮願先生憐箕帚之婦不克永
年錫片言以揭其葬將不悼其不幸於九泉矣乃又曰

劉氏南陵人故嘉松鹽運分司劉念怡公諱祖佑長女
也年二十二來歸於理而先妣呂宜人病婦戚形於色
凡湯藥抑搔晝夜無稍懈迨宜人不起視殮居喪盡哀
與禮會先大夫本然公初判閩南隨侍於壺蘭官署中
饋盤匜錢刀筦鑰悉委治之條次井井罔有缺失明年
先大父無墨公棄世先大夫解組歸山陰時婦方娠屆
期產於旅邸舉一女曰蓀越八日而婦歿雲波遜澗扶
櫬無兒倉猝中途飄零遺挂維時乃乾隆二十四年正
月十一日也存年二十三歲後二十有五年其女殉夫
自殯以節烈見稱於時咸謂劉氏無後勝有後矣雖然

何忍言之劉氏旣率之四年復娶廣陵楊氏乃甘肅沙
州協都閫楊仲和公諱景達之女當先大夫之署篆東
蘭也猶狃遭釁苦賠償遂典質其釵璫服御佐亟需之
費又數年理思以貲易冠帶告助於內復傾篋而出之
怡然以荆布自安視尋常巾幘客且私者識殊遠撫四
齡蓀女慈愛纏綿十四年以至於嫁人幾不知爲劉
氏所生楊亦自忘其非腹出也及先大夫率於鎮安官
舍理以事留滯徐州婦亦歸寧邗上聞宦櫬抵越有期
星夜奔江東於涇口橋與靈輶遇哭送以歸一時戚族
觀者皆曰知禮於乾隆四十九年七月十八日卒存年

四十有八子一名鏘纔十四齡女二俱幼理春秋不滿五十再喪其耦弟絜諸偕老恆情猶不勝絕續存亡之感剗其克勉庸德無蹈愆尤者又二人同一轍歟余曰嗟乎如子言兩安人可謂賢矣閨門賢不易得得其一世猶難之相繼以賢不更難乎子之愴然於懷切切然有求於余而不能自己也固宜今以往子當勿娶而或不免於所借幸回思今日之請而無忘兩婦之賢也其詞曰

卯金衍緒闢西肇祥後先作婦歸逢其良有儀有範閨門之光壁萎蘭茝勿竟厥芳生不晤語死偕所藏徵信

在石遺徵孔長

誥授奉政大夫顯祖考月山府君祖妣胡宜人合

葬壙誌

先大父之棄養也三十有一年先大母之音容相隔也三十有八載矣今始得歸葬於山陰之謝墅嗟乎豈謀吉壤以庇子孫哉苟一不慎則蟲蟻侵其膚水泉浸其骨是入土爲安者恐入土而愈不能安也大父諱文彬字仲玉號月山先世居潯陽自元季宗陽公由豫章遷會稽陶堰遂爲會稽陶氏之始傳十二世高大父叔咸公於順治戊子諸暨山寇肆掠山會村堡避難於蕭會

大父燮庵公擇里而處不復東補蕭山弟子員卒贈大夫祀鄉賢有三子長文彪以州同職宣力河防卒於淮季宣山東臨朐縣知縣大父其仲子也爲山陰諸生有聲與蕭之陳山堂何紫庭袁膚功三君同硯相得三君皆自謂學力不逮遠甚然陳早入館閣何袁兩人亦相繼登科第獨大父久躡揚屋竟落落無所遇康熙壬午應京兆試又得而復失嗣是遂絕意功名援例補四川彭水縣知縣旋擢福建漳州府同知兩遇

覃恩以文林郎晉階奉政大夫先大母初封孺人晉封宜人大父生平所爲制義初宗文止宜壑一變而爲震

川荆川借刻他氏者頗膾炙人口未嘗與人言也弱冠時曾爲昌其單公作雪園集序西河毛檢討見而賞之名大振詩有摩雲烏石金臺錦城武夷等集近體多於古詩五七絕多於律詩大都得力於龍標供奉襄陽右丞今所雕鐫行世者僅十之二三云性嗜書建樓三楹以貯之摩雲集所云書樓題萬卷畫舫字方壺者是也中有經史及諸子百家金石刻合萬有三千餘卷其前明五十家及

國初人時文稿不在限每歲夏日必曝書中庭雖烈日如焚汗流兩注弗以爲勞其居家孝友蜀閨宦績俱載

淳安方樸山先生墓誌中茲勿贅述宜人善女紅不習文史然見書輒寶愛之逮吾祖貯書日積益色喜曰此吾子孫膏腴產也雖無負郭田亦可矣大父將赴蜀時宜人以吾父雙峯公孱弱終鮮兄弟勸置側室遂卜姓於郡之謝公橋得王孺人而西稱孺人者以吾叔父紫峯公爲所出通籍後得邀

錫典也宜人素明樛木葛藟之義故待王孺人恩禮有加宜人爲

敕贈承德郎雲南府通判源長胡公之女慈惠性成其於戚族中有貧不能卒歲者有子女長成不能婚嫁者

有病危將絕者來告貸雖當空乏亦必傾筐倒篋典衣以應之急人難如已私其事不勝枚舉大父性嚴厲當盛怒時蠅蚋不敢過宜人和平渾厚如洋洋千頃波大父飲食必精且細宜人雖粗糲菜羹醕醕有味及垂暮之年一則卷帙不離手一則紡績無倦容其勤於所業又未嘗不相同也有子二長卽吾父雙峯公候選州同知因大父見背哀毀成疾四閱月而逝次紫峯公諱士麟乾隆丙戌進士甘肅張掖縣知縣孫四亡其一曾孫六元孫三除幼穉外或列膠庠或登國學俱無鄙夷書卷而嬉者當宜人彌留之頃曾執藻手而言曰功名爲

世俗所尚汝學猶可冀勉旃毋自怠也顧媿寒櫟荒樗
天廢在昔辜負明德嗁嗁終身今兒子廷珍幸邀鄉薦
亦未知他日所到遠近何似廷琡已三遇賓興不得上
所望與羣從輩刻厲黽皇以無棄先人之命宜人率於
乾隆三年十一月二十七日年八十有一閱八年而大
父率乃乾隆十年十一月初十日年八十有五擇乾隆
四十一年十一月十六日合葬於山陰謝壘之小天柱
而以王孺人祔焉先是大父解組歸嘗延地師買小舟
出郭徧尋葬地出必命藻隨凡岡巒平坦阡陌寬閒處
稍可裁者大父必與師反覆揣摩良久乃罷遇懸崖峭

壁則授藻數語同師先陟如所語始扶掖而登否卽棹舟還如是者凡七載竟無所遇大父旣卒藻復與講堪輿者東窺山會諸山三載又不可得藻以貧故出走燕南趙北及於粵閩久乃歸聞城南塔方基可取擴以試之明年啓視濕遂棄去復東尋巖谷原田終不可得又明年有傳謝聖鉏家山頗佳命廷珍往觀其處地師曰善遂持金易之其山有圓崕高出雲表土名雄鵝突背徐青藤因其名不雅馴易名蓮蕊峯今山人仍呼其故號形家以其次於天柱也復以小天柱呼之攷賴文俊少陰山鈐記有東南大地真珠數之句或云指青塘卽

俗所稱盤龍塚者早爲族祖所葬嘉麻已徵或云尙在
鉏家山茲不具論第穿其土細如鉛粉膩若凝脂質具
堅剛色兼五采若迥異他山者買山錢出自張掖廉俸
葬費因之維時按抉崖窺酬酢親朋握算錢刀指揮夫
役皆廷珍力肩其事而廷玠廷琡亦贊襄之若夫相度
地形定穴與向者則大義汪星旋也

李姬生塚誌

姬姓李名桂芬字愛泉先世新安人也以父爲吳門贍
壻遂家焉居閭門外二里許年十六歸余余方僑寓專
諸巷買舟攜以歸時在乾隆庚子六月望日也越三日

抵錢塘初憩西湖東岸之范氏山莊旋移泊鷗舊墅未知書也見題壁諸詩輒流連不去爰授以唐詩百餘首旬日悉成誦詢曰詩可學乎余戲答之曰苟識琴中趣何勞絃上音姬信爲然也卽止勿復問性嗜桂窗前有老桂二樹秋來花特盛常徘徊其下甚至梯而上選平柯坐焉西南隅有泉一泓味甘美清冽可鑒毛髮每汲必倚檻注觀良久乃去一日乞名於余余名以桂芬字以愛泉姬悅甚蓋從其所好也余於南北山裏外湖之勝十日閒必有五日遊籃輿畫舫姬無不相隨雖閨闥裙釵頗解煙霞之趣每歲春夏在湖秋冬返里往來吳

越者凡五年自余年七十歸衡河舊第不復西明年姬有疾不言余亦未省也又明年病憊且革至勺水不下嚥始延醫調治時城東陸準齋方以醫鳴投藥二劑稍稍飲湯準齋曰此病猶可藥藥必無閒以貧無買藥錢病者又苦於服藥遂勿藥蔓延數載漸成痼疾骨理閒寒熱互作其寒也如冰其熱也如焚醫家所謂癆瘵者是也年愈增則病愈甚將終其身勿瘳矣余甚憫之丙辰余患臂癰創鉅痛深展舒不得姪善爲調護量水稱藥扶掖搔歷五十晝夜無少怠姪病軀也以病事病若自忘其病者余今年八十有四矣憶自七十五六以

來氣血凋耗日就衰頹枯木形骸百事俱廢凡饑飽溫涼之辨行立坐臥之艱悲愁喜怒之感方動於中未形於外姬悉能先意承旨曲體其微雖余糟糠婦恩愛如孫孺人在亦無踰於此殘喘之畱惟姬是賴自幼工刺繡旣歸余知養蠶能勤紡績暇則窺書最喜攷古來人物典故每覽郡縣志及家傳等案頭有廿一史彈詞註繙閱良久雖未盡曉亦畧能言一二余性健忘老尤甚姬善記憶如某言某事見聞於某處卽相隔十餘年能歷歷指陳井然不紊世之爲人委者初嫁時聞無主母卽欣然色喜謂可專房恃寵及入門辭勞就逸不知家

政者比比姬則因孫孺人早逝家失主持苦無依傍詔
提撕教誨杳然難追輒悔我生不辰年少歸遲勿獲一
見孺人顏色爲憾癸丑葬孫孺人於山陰之謝墅其右
虛一壙爲姬所藏身之處姬生於乾隆三十年二月初
七日族率有期從而祔葬焉日者謂余運逢酉不吉至
已未當死今屆此太歲余不能視姬之殮矣姬旣無子
女又乏錢刀疾病淒其與誰告語是余於死之日爲死者
姬於生之日皆死也悲夫余死孰知其事余眞摯周
詳如此者卽生平行事尙無戾於時故爲此志俾納於
擴中以慰之其詞曰

大婦德兮中婦命位處卑兮性克順知埋幽之得所兮
亦何憂於後殯

承德郎胡文可先生墓碣

故候選府經歷松堂胡公初殯於邑之城西乾隆三十四年七月八日將卜葬於城南之張龍橋旣窆有期嗣君紹基捧其先人行狀句余一言以表其墓余祖母系出於胡與公父北山公爲羣從兄弟故余家有累世中表之誼義不敢辭爰應其請爲文以勒諸石焉按公諱煥宗字文可號松堂蕭山人也幼喜讀書爲文根柢經籍時海昌查氏多淹博宏通之彦公相與切劘砥礪文

酒之會篤於敦槃臨池工染翰與聲山太史之筆同矩
彊世有得其零牋斷楮珍比雙南因數奇於場屋年既
冠遂棄舉子業幕遊四方一時名公鉅卿交相器重東
帛盈門先是其父北山公饒幕才在粵中制府久公從
遊五嶺鯉庭之訓有淵有源其於錢穀兵刑之要簿書
文告之棼所觸如觀火以是故也嗣由甘肅授例謁選
都門以疾率於京邸年三十有四自古職膺民社者莫
不藉賓師贊襄佐理得其人則政聲隆不得其人則勲
猷替然韓愈之在徐州杜牧之在淮南陳堯叟歐陽修
之在錢思公處皆已成進士緣不應詞科不得館職先

爲記室制如斯也所以不數年卽超擢而去若夫石洪
溫造二處士之參謀烏府於功名無與焉嗟乎公旣不
能如韓杜諸人之周旋記室登進有階而僅如溫石輩
之勞形案牘流譽人間已足悲矣柰何初謁選人遽歸
寘漠爲人則能建補袞作霖之駿業爲己則不能爲抱
關擊柝之下僚在侯門則歲受千金之聘而猶未慊於
心慕仕版則祇干五斗之祿而尙違其願若天特授以
羚羊片石爲斯人印綬俾世其業者終其身此懷才抱
器之士所以語及弓旌道逢冠蓋不禁撫膺而長嘆也
公元配王孺人早逝繼配吳孺人生二子長曰祖培卽

紹基也年九歲次日壇年四歲公殂孺人年甫三十家僅遺負郭田二十餘畝悉售於人始得歸公旅櫬殯於鄉孺人四壁蕭然斂斂子立以刺繡紡績易米而炊撫二子成立以賢節聞於鄉既歿以禮合葬於原塋地墓門高廣皆如制云

祭文

祭大中丞客可莊公文

華嶽晨頽箕星夜落泗水傷麟遼城望鶴朝士咨嗟著生驚愕功載旂常悲闔巷郭惟公碩德閒氣所生閩粵山海鍾靈毓英高文典冊鏘然鯨鏗臚傳第一於昭令

名校書天祿青藜燄騰

內廷供奉譽重南齋比唐燕許擬漢鄒枚皇華作使玉
尺量才封疆旋寄開府江淮民歌樂只有臺有萊謡誅
忽逢吳門解組一蹶自傷九闕曷籲夙夜寅恭

簡心有素

皇帝曰咨朕其宥汝廼撫荆襄廼遷浙滸大江之南
襜帷重駐節鉞桓桓無憂南顧一柱勳崇三台位著周袞
商霖經綸並裕佐此太平調元贊務四極四和陰陽風
雨黃扉上相弁冕羣卿方殷湛露又值驚霆魂飛湯火
巢卵將傾

聖恩屢沛臣罪重膺雖思報國取望全生仰荷

溫綸如天之福戴月宵馳來奠南服如醇斯飲如春斯
育文恬武熙渾渾穆穆躬負沈疴未弛案牘

天子慰勞忠誠彌篤宜享遐齡永綏百祿詎料簪旌遽
辭華髮人生五福公又何虧外侔方召內登舉夔楚閩
吳越謳歌勿衰豐功駿烈汗青有輝入坎出坎困極泰
隨怡然駕鶴含笑雲遙所憐海嶠吏民感愴若失怙恃
恩深不忘若摧梁棟曷依於堂素車白馬淒其道旁傾
河坼華哭撼瑤闇某等職荷帡幪誼蒙嘘植庇我桑梓
福我郡邑願奉德輝長供驅策悵彼穹蒼隕茲柱石郇

雨召棠芳徽永隔緬想儀容桓圭赤舄難遣巫招空隨執紳敬獻椒漿靈其俯格

祭楊農先學士文

洛下鬚眉襄陽耆宿天漢騎箕崑岡摧玉琴與人亡哀闢華屋詎獨黃門興悲汙督公先太尉高風可攀屢遷始定蘭陵之間桓桓鼎族世列清班兩行蓮炬六扇屏山金缸璧帶疊映塵寰間氣生公聰明獨厚入齡趨庭賓集左右歌臺浣紗翁攜公手西子標題文成脫口不僻不佻循循孝友孔鑄顏鎔爲鄉祭酒座右懸箴步趨是守學者咸宗泰山北斗鑾坡人直冰壺在心獻南巡

頌雅健雄深秦關蜀棧奉使遙尋潭潭雲壁霜花染林
鞭絲帽影風雨長吟史纂前朝錄軸充棟靖難奪門後
先聚訟抑蠶而談言之輒中穆堂望溪交相引重余謂
扶風公其接踵三朝實錄一統志書堂皇國史甲乙分

廚

帝曰都哉惟汝襄諸承命攝職厥業勤劬魚經蠹緯手
口率瘡有加爵秩爲光里間不暇窺園何曾投閣抒寫
性靈四言閒作匪嵇匪陶別成邱壑藥榦茶鎬蕭然自
樂拄笏看山煙嵐到郭平生日月窮經更多旣嗟羸火
未宏網羅還嗤漢儒補綴偏頗以釐以核以正乃訛昔

有衛武好學及晝今有我公暮年深造歸然靈光後來
是導胡墜虞淵返景如掃公其怛化抑又何憂紫泥載
錫宮雲滿樓河東三鳳作楫作舟書留三篋貽厥孫謀
所傷某等舊雨綢繆白楊何巷酸風射眸不遺一老懷
愴山邱莎芬椒醑大白用浮靈旂不遠來覽重幽

祭翰林編修閭齋陳先生文

瀛圃凋華文騶絕鞅華屋風淒山陽淚益翳公譜牒太
邱是宗凌雲闕闔峽石湖東蟠根祖德綿亘且豐相臣
佐運手拓鴻濛蕭內巨業擊撞鐘鏞靈椿碩茂容臺望
隆典周禮樂肅肅雍雍鯉庭趨對克家在躬矧依屬序

揆席勲崇燮調鼎鼐十兩五風濟美競爽非夔卽龍鄉
間譽溢孝友溫恭公實雋才兼之淹博視草鸞坡燃藜
秘閣翠管銀罇分攜面藥一蹶中途摧牙落角跌宕文
史笑傲邱壑歲在重光

恩普萬國向日傾葵瞻拜惕若

帝念老臣錫其舊爵書煥紫泥誥輝朱鵠爲光幕年色
飛眉躍清班世列有榮有年元方旣雋季方又賢後先
史筆曰談曰遷一門蕊榜領袖羣仙驀地盲風沙飛石
走蕉鹿途迷人琴何有庚子日斜南天失斗某等如僑
視札惟梓與桑無情太上奪此老蒼同舟錯愕舊雨淒

涼蓀花寒食野水荒荒靈旛天末乍陰乍陽未忘膠漆
來鑒茲觴

祭國子監助教家東溟先生文

夫何太上之忘情兮不憇遺此老蒼莊夢蝶而不醒兮
巷蕭蕭乎白楊驚哲人之云萎兮其誰不傷矧同譜之
情殷兮涕汎瀾而隕裳君之生兮卓犖牛心炙兮早嘗
探靈威之秘簡兮健於文章饑寒驅而出去兮羅浮路
長當一歲而七冠文壇兮何作作其有芒張吾軍兮南
海拔赤幟兮五羊識良桐於爨下兮藻鑒非常開扶風
之絳帳兮問字車來於四方蘭臺敞其走馬兮列玉筭

之頭行典周禮樂兮晉南宮而拜郎笏魚鬚而鵠立兮
東序西房奉儀型於宗伯兮分清齋於太常方升中而
旅泰岱兮厭儀用襄初不改乎此度兮胡颺然而來璧
沼之旁手摩挲夫獵碣兮銜雞舌而猶香或虞翻之命
蹇兮嗟易老之馮唐鱗何爲兮木末鳳何爲兮曲塘大
隱隱朝市兮歌聲發而金鏘佩香茝以爲璲兮豈余情
其不芳無下灑以種秫兮况三舟之詠觴灑有巾而無
酒兮嘆白衣之我忘守一官而長冷兮等窮餓之翳桑
嶺雲出而難返兮悔不從事乎華陽忽不期其召疾兮
河魚是殃痛今辰而明已兮繼修文之卜商朝騎龍於

天上兮夕靄闔夫黃腸嘉平朔兮天雨霜肅瓊瑤兮升
君堂陳桂醑兮奠柘漿芙蓉城兮旌旆揚靈之來兮白
雲鄉炳文昌兮載六匡牘無絃兮在壁對籬菊兮彷徨
詰贈通奉大夫江西布政司使邃亭顏太翁祭文
嗚呼大壑舟移丹山鳳往鑿柱人間騎箕天上響輟絃
桐塵生几杖梁木云頽楷模安仰翳公譜牒充國榮封
遷閩及粵卜宅靈鍾綿綿瓜瓞用光厥宗生公挺異金
鐘大鏞電流於日星羅乃胸丙丁甲乙左右原逢淋漓
染翰如金在鎔旣冠簪序載雄辟雍將秉師鐸振聾策
慾十試棘闈牙擢角落雖類爨桐寧嗟屈蘋匪簾匪瓢

履豐能約養厥深醇以砭涼薄肝膽照人千金季誥矯
然不羣雲中隻鶴庭階蘭玉有源有淵譬彼天錦七襄
聯翩惟我方伯白眉最賢聲清老鳳巨翮騰翥迺登岳
牧迺甸廼宣矧有仲氏馳驅後先鳴琴循譽亦聞於天
公曰勉旃慎修爾職受訓過庭小心翼翼移孝作忠記
取不力克壯屏藩保釐社稷分陝勲庸盤根世德周袞
商霖槐陰手植逍遙官閣初瞰汾流秦碑魯殿摩挲幾
秋牂牁夜郎鞭絲影畱建溪廻互灘聲導舟匡廬彭蠡
兩見扶鳩就茲祿養以遨以遊安富獨備尊崇孰儔連
平壤僻萬山之中誰離鄉井徧覽土風惟公豪邁噓氣

成虹登山觀海自西自東若漢司馬篇章益雄天錫純
嘏康寧厥躬

龍章疊受

襄寵斯崇丁亥春和流芳感賦圖畫甘泉鸞鳳失侶遂
挂歸帆涕零如雨曉此林泉聊怡杖屢溪友田翁歎然
道故星聚荀陳衡杯索句百尺秋高靈椿一樹含飴課
讀繡虎諸孫耄而勤學傳經望尊致書江右諱諱與論
勿爲我念勉酬

國恩方慶芝秀五色綯緼何來鶠鳥集於德門人謂我
公天宜永佑石鼓難磨靈光必壽應人香山長推耆舊

痛屈三彭胡然叢亥日在崦嵫陽窮數九永闕銀蠶迢
迢夢久惟公令名如星垂斗惟公積善如松斯茂孔厚
貽謀克昌厥後所悲生者薤歌在口欲式儀型無鄉祭
酒欲質文章無燕許手四百峯前少微何有某等於方
伯舊屬情親仰公碩德炳炳麟麟驚聞哀訃彌傷哲人
靈旂天末縹緲無痕羣瞻嶺嶠雪涕沾巾黃蕉丹荔蟻
烟遙申

誥封恭人蔡母姜恭人祭文

玉女峯頽夫人城圮輝掩星娥光寒月姊大衍數終薤
歌聲起金馬碧雞鄉關萬里仰企恭人名門淑媛裔出

渭濱家從越甸趨庭咏詩聿來永善觀察蔡公射屏中
選和鳴鏘鏘鳳凰交羨中饋善承蘋蘩能薦孝哉恭人
人言無閒綺紈不御井臼勿忘何圖閥閱逢茲孟光聲
清雛鳳授經蘭房米鹽瑣屑經畫有常克勤克儉勤罔
不臧惟彼支祁英疆是侮釜竈生波魚眠在樹惟我蔡
公不遑寧處官舫如梭織於水滸恭人舟遇致詞於前
莫問家政家政非先恐消厥意勤民勿專人聞此語謂
恭人賢能知大體不爲私牽屢沐

恩榮兩膺

鳳誥象服魚軒載遊鷺島恭人有言華靡莫效鑒彼前

車不貪爲寶宛如曹郎蔬食可飽克相夫子用展經綸
令聞令望於昭十閩允宜偕老鶴髮同新胡天弗佑不
笑以翬羸簫聲斷玉臺生塵某等誼與蔡公忝居僚屬
驚此凋蘭嗟其碎玉曰殯琳宮珠旛櫂燭日瘦風餐芳
魂繞谷六詔迢迢素車縞服總帳銷紅松門映綠敬筆
芳蓀用申虔肅

誥封一品夫人崔母李夫人祭文

嗚呼湘江竹隕天姥峯傾金菱掩形鳳管無聲鶻啼鳥
石松折榕城銷沈德範惆悵芳型懿惟夫人名門淑女
仙謫人間根蟠天宇僕射金貂臨淮旗鼓畫戟聯楣瑤

列接武鍾此閨英林風擅譽允矣鍼神揚芬三楚綺歲
牽蘿于歸制府其儀淑慎厥性柔嘉吟篇飛絮書格簪
花朵蘋薦廟主饋承家鳴鷄戒旦如賓是誇穆木逮下
恩慈聿賒克相夫子副笄六珈相隨官閣畫鵠香車晨
風夕月燕豫長沙山青泰岱嶺轟仙霞江吳岸越爰泛
仙槎純禧懋嘏景福稱遐起居八座命婦頭行疊膺

鳳誥寵錫

龍章魚軒象服瓊佩鏘鏘楷模巾幘於閨有光昔有賢
媛配於王章牛衣風雪愁焉自傷今者夫人天錦七襄
吳綾蜀綺安富帷房繡彼桓氏德匪不揚躬親挽鹿盡

葬勿遑今者夫人履不下堂執巾奉櫛金釵繞旁詎矜
侈泰天降爾康齊輝升佶嫋美姬姜令妻壽母曾頌懷
芳庭舞斑衣杖扶靈壽四傑是徵三珠特茂或著經綸
螭蟠印紐或守縹緲才量以斗白髮含飴孫曾攜手寶
巒珠鞭含英苗秀竹脆絲清華鎔似畫百福壘凝齊眉
壽耆仙級雲華人閒罕有何圖鶴駕遽返瓊田榦擢月
桂香銷井蓮銀蠶永闕蕙幄空懸徘徊執拂惝恍靈筵
桓桓襄鄂弓刀肅然視兵抵浙廻旬廻宣勤勞爲國分
釵敢旋鴻銜悲訃淚灑吳天嗚呼夫人五福已全滔滔
江漢壺範誰先十閩兩浙羣瞻母賢蓉旌一去鶴語何

年令儀嘉則圖畫甘泉於昭形史芳徽永傳琦等仰沐
憲仁彌欽淑德璧月韜輝珠星斂色莫獻金膏徒傷翟
茀洛珮迢遙薤歌愴惻坤教崇深言難罄述丹荔黃蕉
靈其來格

汪母徐宜人祭文

聿惟坤範系出南陽溫恭克讓德協珩璜機絲夜月砧
杵秋霜履豐能儉勿炫釵鑰侃母顎母今古相望賢聲
偉識卓然非常喬宜人在惠而且莊不卑不亢以御帷
房惟宜人淑善爲贊襄侍奉白髮肅爾蒸嘗淒清粉署
辛苦曹郎魚鬚左右熏籠護香綿彼君子山守巖疆輕

嗣南下黛梳脂箱浙水之東四明之旁執巾奉櫛婉怡
相將潮音禮佛珠旛影長敢云偕老猶稱晚芳年逾大
衍雙鳳翔五花鸞誥裏來天閻受茲介福旣壽而康
今年仲春

鑾輿幸揚宜人命子先發蓋藏鳩工伐材葺平山堂流
丹飛翠輝於蜀岡

帝心悅豫厥績用彰晉以大秩爲光斯鄉拜

恩二陸告母稱觴宜人含笑永言不忘胡然遘疾遽入
膏肓萱生堂北倏焉摧牋哀哀廣柳蕭蕭白楊皋魚飲
泣削杖瘠傷僕御助哀隣閭感愴某等誼忝葭末維梓

與桑安能如昨拜母登堂燈明蕙幄酸風夜颺女宗難
再松楸渺茫聊申悃款用奠椒漿

泊鷗山房集卷八終